



Služba za reviziju finansijskog poslovanja

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00 i 102/09), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2008. GODINU I POSTIZBORNOG FINANSIJSKOG IZVJEŠTAJA – LOKALNI IZBORI 2008. BOSANSKOHERCEGOVAČKA PATRIOTSKA STRANKA-SEFER HALILOVIĆ

Broj: 03-07-6-1523/09
Sarajevo, 14. aprila 2010. godine

SADRŽAJ:

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije	5
Cilj revizije	5
Obim revizije	5
4. PRETHODNE REVIZIJE	5
5. NALAZI I PREPORUKE	6
5.1. NALAZI	6
5.2. PREPORUKE	7

MIŠLJENJE REVIZORA

Služba za reviziju finansijskog poslovanja u Centralnoj izbornoj komisiji BiH je izvršila reviziju finansijskih izvještaja Bosanskohercegovačke patriotske stranke-Sefer Halilović i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2008. godine.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.
Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka i članom 15.10 Izbornog zakona BiH.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Utvdili smo da Bosanskohercegovačka patriotska stranka-Sefer Halilović u izvještajnom periodu nije postupala u skladu sa odredbama člana 8. stav (1) i člana 11. stav (1) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Bosanskohercegovačka patriotska stranka-Sefer Halilović u 2008. godini postupala u skladu sa odredbama Zakona o finansiranju političkih stranaka i člana 15.10 Izbornog zakona BiH.

1. UVOD

Služba za reviziju finansijskog poslovanja u Centralnoj izbornoj komisiji BiH je izvršila reviziju finansijskih izvještaja Bosanskohercegovačke patriotske stranke-Sefer Halilović i to: godišnjeg finansijskog izvještaja za 2008. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora održanih u oktobru 2008. godine.

Revizija je preduzeta u skladu sa članom 14. stav (1) Zakona o finansiranju političkih stranaka, članom 24. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Bosanskohercegovačka patriotska stranka-Sefer Halilović je iskazala ukupne prihode u iznosu od 524.516,61 KM¹, čija struktura je data u sljedećoj tabeli:

Red.br.	Vrsta prihoda	Iznos u KM	Učešće u uk.prih. %
1	Članarina	2.366,50	0,45%
2	Prilozi fizičkih lica	6.605,07	1,26%
3	Prilozi pravnih lica	4.500,00	0,86%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	750,00	0,14%
7	Prihodi iz budžeta	509.496,54	97,14%
	Ostali prihodi	798,50	0,15%
	Ukupni prihodi:	524.516,61	100,00%

U godišnjem finansijskom izvještaju politička stranka je iskazala ukupne rashode u iznosu od 840.485,52 KM².

2. PREDSTAVLJANJE POLITIČKE STRANKE

Naziv političke stranke: Bosanskohercegovačka patriotska stranka-Sefer Halilović. Skraćeni naziv stranke je BPS-Sefer Halilović.

Stranka je upisana u registar političkih organizacija 1996. godine. Posljednja registracija je izvršena 12.05.2006. godine u Općinskom sudu u Sarajevu pod brojem Reg-1012/06.

Sjedište političke stranke je u Sarajevu, ulica Husrefa Redžića br.4.

Lice ovlašteno za zastupanje stranke je Sefer Halilović, predsjednik.

Lice ovlašteno za podnošenje finansijskih izvještaja za 2008. godinu je Nalvedina Dedagić-Čengiđ.

¹ Podaci iz ispravljenog obrasca 3 (ukupni prihodi), koji je dostavljen dana 12.04.2010.godine.

² Podaci iz ispravljenog obrasca 4 (ukupni rashodi), koji je dostavljen dana 10.02.2010.godine.

Prema podacima iz godišnjeg finansijskog izvještaja za 2008. godinu, organizacionu strukturu Bosanskohercegovačke patriotske stranke-Sefer Halilović čine:

- Centrala BPS-Sefer Halilović,
- 6 regionalnih odbora, i
- 67 opštinskih odbora.

3. OPIS REVIZIJE

Predmet revizije su godišnji finansijski izvještaj za 2008. godinu i postizborni finansijski izvještaj – Lokalni izbori 2008. godine Bosanskohercegovačke patriotske stranke-Sefer Halilović i to sljedećih organizacionih dijelova:

- Centrala BPS-Sefer Halilović Sarajevo,
- Regionalni odbor BPS- Sefer Halilović Sarajevsko-goraždanske regije i
- Opštinski odbor BPS- Sefer Halilović Tešanj.

Cilj revizije je da revizoru omogući da izrazi mišljenje o tome da li je Bosanskohercegovačka patriotska stranka-Sefer Halilović u izvještajnom periodu postupala u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine.

Obim revizije finansijskih izvještaja Bosanskohercegovačke patriotske stranke-Sefer Halilović obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode iz budžeta i troškove kampanje.

4. PRETHODNE REVIZIJE

Izvršen je pregled godišnjeg finansijskog izvještaja Bosanskohercegovačke patriotske stranke – Sefer Halilović za 2005. i 2006. godinu i izdati izvještaji o pregledu sa mišljenjem revizora, nalazima i preporukama revizije. Služba za reviziju je izvršila reviziju godišnjeg finansijskog izvještaja za 2007. godinu i izdala izvještaj o reviziji sa mišljenjem revizora, nalazima i preporukama da stranka treba da postupa u skladu sa odredbama člana 8. stav (1) i člana 11. stav (3) Zakona o finansiranju političkih stranaka.

Nerealizovane preporuke

Na osnovu uočenih nedostataka u godišnjem finansijskom izvještaju za 2008. godinu, utvrđeno je da politička stranka nije ispoštovala sve preporuke koje su date u navedenim izvještajima. Stranka je i u 2008. godini koristila prostorije opštinskih organa uprave što je u suprotnosti sa odredbom člana 8. stav (1) Zakona o finansiranju političkih stranaka.

5. NALAZI I PREPORUKE

5.1. NALAZI

- a) Na osnovu obavljene revizije godišnjeg finansijskog izvještaja utvrđeno je da je Bosanskohercegovačka patriotska stranka - Sefer Halilović prekršila odredbe člana 8. stav (1) Zakona o finansiranju političkih stranaka.

Opštinski odbor BPS-Sefer Halilović Ilidža je tokom 2008. godine bez naknade koristio prostorije Općine Ilidža, površine 23,06 m². Obzirom da visina zakupnine za I zonu, u kojoj se nalaze poslovne prostorije koje koristi OO BPS-Sefer Halilović iznosi 12,00 KM/m², vrijednost nenovčane donacije koju je stranka primila od Općine Ilidža iznosi 3.320,64 KM.

Takođe, shodno Odluci Općinskog vijeća Ilidža³, stranka nije imala obavezu da plaća električnu energiju, vodu, centralno grijanje, niti naknadu za odvoz smeća i redovno održavanje zajedničkih prostorija.

Koristeći bez naknade prostorije Općine Ilidža i neplaćanjem režijskih troškova, stranka je postupila suprotno odredbi člana 8. stav (1) Zakona o finansiranju političkih stranaka.⁴

BPS-Sefer Halilović je primila nenovčanu donaciju Općine Vareš u iznosu od 49,99 KM, čime je prekršila odredbe člana 8. stav (1) Zakona o finansiranju političkih stranaka. Služba za reviziju je izvršila uvid u podatke koje je dostavila Općina Vareš i utvrdila da je ova Općina izvršila plaćanje računa za zakup poslovnih prostorija za februar 2008. godine koje koristi OO BPS-Sefer Halilović Vareš.

- b) Stranka je prekršila odredbe člana 11. stav (1) Zakona o finansiranju političkih stranaka.

Bosanskohercegovačka patriotska stranka-Sefer Halilović je postupila u skladu sa preporukama Službe za reviziju koje su date u Preliminarnom izvještaju o reviziji godišnjeg finansijskog izvještaja za 2008. godinu i postizbornog finansijskog izvještaja – Lokalni izbori 2008., i izvršila ispravku obrazaca godišnjeg finansijskog izvještaja za 2008. godinu čime je postupila u skladu sa Pravilnikom o godišnjim finansijskim izvještajima političkih stranaka i članom 11. stav (3) Zakona o finansiranju političkih stranaka. Međutim, u svojim poslovnim knjigama za 2008. godinu nije evidentirala pojedine prihode i rashode, odnosno nije vodila adekvatne evidencije o svojim приходima i rashodima, čime je prekršila odredbe člana 11. stav (1) Zakona o finansiranju političkih stranaka.

Troškovi predizborne kampanje

Bosanskohercegovačka patriotska stranka-Sefer Halilović je postupila u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 334.426,23 KM.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM⁵ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije

³ Odluka o dodjeli na korištenje bez naknade poslovnih prostorija Općine Ilidža br. 01-02-339/08-8 od 19.02.2008. godine.

⁴ Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

⁵ Član 15.10 stav 2. propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

BiH, Bosanskohercegovačka patriotska stranka-Sefer Halilović je u svrhu izborne kampanje mogla da potroši 838.333,22 KM.

5.2. PREPORUKE

Preporučuje se Bosanskohercegovačkoj patriotskoj stranci-Sefer Halilović da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da postupa u skladu sa odredbama člana 8. stav (1) i člana 11. stav (1) Zakona o finansiranju političkih stranaka, i to:*
 - *da ne prima priloge koji su zabranjeni ovim zakonom i*
 - *da vodi računa o svojim prihodima i rashodima.*

- *da ustroji upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne). Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma⁶.*

KOMENTAR:

U ostavljenom roku, Bosanskohercegovačka patriotska stranka-Sefer Halilović je dostavila primjedbe na nalaze koji su navedeni u Preliminarnom izvještaju o reviziji godišnjeg finansijskog izvještaja za 2008. godinu i postizbornog finansijskog izvještaja – Lokalni izbori 2008. Stranka je, takođe, dostavila i ispravljene i dopunjene obrasce godišnjeg finansijskog izvještaja za 2008. godinu. Služba za reviziju je izvršila uvid u dostavljene obrasce i utvrdila da je stranka otklonila nedostatke u finansijskom izvještaju, čime je postupila u skladu sa odredbama člana 11. stav (3) Zakona o finansiranju političkih stranaka.

Služba za reviziju je razmotrila primjedbu stranke na nalaz u kome je navedeno da je Bosanskohercegovačka patriotska stranka-Sefer Halilović primila zabranjeni prilog (nenovčana donacija) u iznosu od 6.155,11 KM. Obzirom da je stranka, dana 05.02.2010. godine, izvršila plaćanje računa, odnosno da je dobrovoljno postupila u skladu sa preporukama revizije i Zakonom o finansiranju političkih stranaka, Služba za reviziju je uvažila ovu primjedbu stranke i ugradila u Izvještaj o reviziji.

Osim navedenog, Služba za reviziju je razmotrila i uvažila argumentovane primjedbe stranke, te ugradila u Izvještaj o reviziji godišnjeg finansijskog izvještaja za 2008. godinu i postizbornog finansijskog izvještaja – Lokalni izbori 2008.

Zahvaljujemo se ovlaštenoj osobi za finansijske izvještaje i zaposlenim u Centrali Bosanskohercegovačke patriotske stranke-Sefer Halilović na dobroj i korektnoj saradnji tokom obavljanja revizije finansijskih izvještaja.

Hasida Gušić, šef Službe

Sanja Čabrilo, revizor

Željko Bakalar, pomoćnik revizora

⁶ Uvidom u dokumentaciju odbora čiji su izvještaji bili predmet revizije utvrđeno je da su blagajnički izvještaji nisu sačinjavani na dnevnom nivou. Služba je utvrdila da je stranka putem blagajničkog naloga isplate br. 42/08 za period 01.10.-31.10.2008. godine isplatila račun OMV d.o.o. od 02.11.2008. godine.